

Opinion ta un seccion di **Bon Dia Aruba** specialmente pa brinda oportunidad na lectoran individual pa expone nan opinion. Contenido publica di ningun manera ta refleha opinion di **Bon Dia Aruba** y ta pa responsabilidad exclusivo di e organisacion/individuo cu ta ofrece esaki pa publicacion. **Bon Dia Aruba** ta reserva e derecho di no publica texto ofreci, si esaki segun e medio no ta cuadra cu e normanan di decencia cu nos ta mantene, pa evita contenido cu ta innecesariamente ofensivo. Esaki suheto na evaluacion exclusivo di **Bon Dia Aruba**.

OPINION



Lilly Marlene Peterson, MA Museologia:

5.5 miyon euro pa fundacionnan y personanan priva na Aruba



5.5 miyon euro a wordo poni disponibel na fundacionnan y personanan priva pa proyecto na Aruba. Esaki ta un parti di e resultado di e pordon di Premier Mark Rutte pa e pasado di esclavitud transatlantico Hulandes cu a tuma luga na Aruba.

E fondo a wordo regla den un arreglo temporario gubernamental cu ta e Tijdelijke regeling van de Staatssecretaris Koninkrijksrelaties en Digitalisering van 14 juni 2024 nr. 2024-0000349322, houdende subsidie maatschappelijke initiatieven trans-Atlantisch slavernij-verleden voor het Caribisch deel van het Koninkrijk.

E publicacion di e arreglo a tuma luga dia 1 di juli 2024. Mira website <https://zoek.officielebekendmakingen.nl/st-crt-2024-21888.html>

E metanan ta, y cu ami ta interpreta y traduci, como lo siguiente: haya un miho comprension di e perseverancia di esclavitud den comunidad y combati e efecto negativo den presente; procesa e pasado di esclavitud; stimula e conocimiento y conscientisacion di e pasado di esclavitud; y reconoce y conmemora e pasado di esclavitud.

Subsidio ta wordo duna di un suma di 10,000—te cu 500,000—euro cu ta depende

si bo ta un persona priva of fundacion y e actividad organisa. Inscripcion pa fondo ta tuma luga via di un formulario digital.

E ministerio na Hulanda ta bay tene momentonan di informacion. Pa participa tuma contacto cu postbus.slavernijverledenKR@minbzk.nl

Un cordial saludos di parti di Lilly Marlene Peterson MA Museologia organisador di e proyecto Caquetio, Africano, Europeo: Nos tur ta un famia. Keda den contacto cu nos via WhatsApp 748 9441 (no direct call) y e-mail: nos-turtaunfamia@gmail.com



Sr. Jayburtt Dijkhoff, PhD:

Aruba conoce un forma di tirania pasivo

Den e curso cu Fundacion SIKI a lansa pa 3 di september venidero titulo ‘Con pa goberna un pais’, pa prome biaha lo expone e secreto publico den nos sistema politico-democratico. Asina Sr. doctor Jayburtt Dijkhoff, presidente di Fundacion SIKI a elabora.

E investigacion haci a muestra cu aunke Aruba a deshaci di e dominio di

Hulanda y Corsou, ainda e herarkia colonialista ta bibo den nos sociedad. E ta asina fuerte cu esaki ta domina e ramo di politica y comercio. Basicamente nos tin un elite cu ta dicta y e pueblo cu tin cu acepta locual ta bin di ariba. Esaki ta fomenta un cultura di miedo y di desconfiansa. Hende tin miedo di papia abiertamente kico nan ta pensa, corda pa participa na e democracia berdadero den nos pais. Esaki ta riba tur frontera, incluyendo medio di comunicacion, cual ta sumamente preocupante pa e formacion di pensamiento liber y expresion liber den nos sociedad. Ni comercio no ta realmente independiente, pasobra nan ta na merced di e elite pa tene cuenta cu nan y yuda nan cu

un ambiente di establece negoshi y crecimiento economico. Comercio ta sinti cu nan no ta wordo scucha debidamente ora cu gobierno ta tuma decisionnan. No ta importa e signatura, colo politico of gabinete. E problema ta sistematico, kiermen tur ta haci mescos. Esaki ta haci cu nos ta den un situacion sumamente peligroso como pais. E herarkia colonialista cu a keda atras a hiba cu awor nos tin un elite dominante den nos sistema democratico, pero no ta mara na un persona. Basicamente, ken cu sinta riba e stoelnan di mas halto, ta comporta mescos. E ta parti di e reglanan formal y vooral informal. Den un palabra: el a bira algo cultural. Esaki ta haci cu nos no por papia di

un dictador, pero un sistema corumpi cu ta haci cu tur gobierno ta musta e mesun característica den un sistema tiranico. Miedo pa represaya y fieltad ciego na e elite ta domina full e panorama. Cualquier critica ta bira un atake personal contra e gobierno of un mandatario.

Esaki ta funesto pa un democracia y a hiba na pobresa extremo. E ta haci nos pais vulnerabel di paden y tambe pa menasa di pafor. Pero nos no ta laat. Nos por cambia e rumbo di nos pais. P’esey Sr. Jayburtt Dijkhoff ta invita henter pueblo di Aruba pa acudi na e curso importante aki pa nos futuro. Aruba tin mester di nos tur.

Skirbi pa Robert Arends

Partido di adultonan mayor?

Si nos mira e desaroyo na Aruba caminda “hoben” nan a “join” otro den un partido politico, e pregunta ta presenta si e “adultonan mayor” di Aruba tambe no mester bin cu nan propio partido politico y participa na eleccion 2025 pa defende y lucha pa nan posicion financiero y social den comunidad.

No bisa cu tin OPPA, paso-

bra OPPA ta un sindicato (un “grupito” exclusivo) representando na prome luga e pensionadonan di Gobierno y nan interes so. OPPA no ta representa interes di tur e adultonan mayor na Aruba.

Adultonan mayor ta tur ciudadano di Aruba riba 60 aña cu ta confrontando un Aruba cambiando; un Aruba cu no ta tene suficiente cuenta cu e adultonan mayor cu pa un of

otro motibo no por participa manera antes mas na tur cos. Adultonan mayor mester “join” otro den un partido politico pa apoya otro riba tur tereno pa asina por lucha pa nan interes—na prome luga? Of adultonan mayor ta djis sigui acepta un of otro politico proclama su mes candidato parlamentario pa adultonan mayor?

Of na Aruba por trata uni



“hobennan” cu “adultonan mayor” riba un lista combina cu cada grupo independiente

di e otro pero formando un poder politico fuerte pa logra cambio?